



SIUMUT

INATSISARTUNI ILAASORTAATITAT / LANDSTINGSGRUPPEN

25. juni 2011

UKA2011/72

Inatsisartut Suleriaasianni § 33 naapertorlugu aalajangiiffigisassatut siunnesuut imattoq matumuuna saqqummiupparput:

Tunngaviusumik Inatsisissaq pillugu piareersaasumik isumalioqatigiissitamik 2012-ip naalernerani pilersitsisoqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Isumalioqatigiissitamut suliakkiutaassaaq Kalaallit Nunaata Tunngaviusumik Inatsisissaannik siunnersuummik Inatsisartunut suliap naammas-sinerani saqqummiussinissaq.

(Inatsisartuni Siumut ilaasortaatitai)

Tunngavilersuut:

Ukiuni 30-ini Namminersorneroreerluni nunarput Namminersulerpoq. Inuaqatigiillu nammiiivikkusunnerannut takussutissaq ersarinnerpaaq tassaavoq Namminersulernissamut taasititsinermi inuaat piumassusermik takutitsinerat.

Ukiut marluk ingerlasimalereerput Namminersulerattali Siumumiilli isumaqarpugut Tunngaviusumik Inatsisissamik piareersaasussanik Isumalioqatigiissitaliorqarnissaa siusinaarpallaanngitsoq, taamaattumik siunnersuutigaarput Naalakkersuisut Tunngaviusumik Inatsisiliornissamut piareersaataasumik isumalioqatigiissitaliorqarnissaannik peqquneqassasut.

Siumumiit isumaqarpugut Tunngaviusumik Inatsisitigut qulakkeerneqassasut innuttaaqataanermi, politikkut, aningaasarsiornikkut, inooqataannikkut- kulturikkullu tunngaviusumik pisinnaatitaaffit. Soorluttaaq Tunngaviusumik Inatsisitigut aalajangersarneqassasoq innuttaasut ataasiakkarlutik inuaqatigiinnut ataatsimoortunut akisussaaffiat, taamatuttaaq avatangiisitsinnut pinngor-titarsuarmut kinguassatsinnut ingerlateeqitassatsinnut.

Qulaani oqariartuutit aallaavigalugit Siumumit isumaqarpugut suliassap aallartinneqarneratigut tamat oqartussaaqataanerat ilutigitillugulu inuaqatigiit sunniuteqaqataasinnanerat peqataatin-neqarnerallu nukitorsassagipput.

Siumup uani eqqarsaatigai inuaqatigiit siunnersuusiorsinnaanissaat saqqummiussisinnaanissaallu isumalioqatigiissitap isummerfissaannik, periuseq tamanna iluatsilluartumik Kalaallit nammineer-lutik Namminersorneq pillugu isumalioqatigiissitaanni atorpaat, Namminersorneq pillugu Inatsi-sissap tusarniutigineqarnerani nuna tamakkerlugu angalaneranni.

Taamaattumik Isumalioqatigiissitap suliassaasa ilagissavaat ataavartumik inuaqatigiinnik isumalioqatiginnilluni oqaloqatiginnitarneq suliap ingerlanneqarnera naatserlugu. Taama eqqarsarneq aallaaveqarpoq Tunngaviusumik Inatsit inuaat aqtseqataanerannut soorunami pituttorneqartari-aqarmat, soorluttaaq inatsisitigut aalajangersarneqassasoq kiffaanngissuseqarluni, naligiilluni qinersinissamut pisinnaatitaaffeqarneq, nunap aqunneqarnerani tunngaviusumik innuttaasut katiti-

gaanerannut tarrarsortumik ingerlatsinissaq, kommunit nammineersinnaanerat nunarsuarmioqatinillu suleqateqarneq.

Siumumiit isumaqarpugut isumalioqatigiissitaq inuttalersorneqarnerani tunngaviusumik Kalaallit ilinniarluarsimasut ilaasortaatinneqassasut taassumallu saniatigut nunat tamalaat akornanni inatsisilerinermi ilisimasaqarluartut misilittagaqarluartullu, soorlutaaq pissusissamisuussasoq Inatsisartut Inatsisinik Atortitsinermut Ataatsimiitaliaannik qanimut suleqateqarnissaq. Taamatuttaaq Siumut isumaqarpoq Naalakkersuisut ammasariaqartut piffisaliussap inissinniarneqarnerani.

Kalaallit Nunaat Namminersortoq nunaavoq Naalagaaffinngornissaminut piareersartoq. Siumumiit isumaqarpugut, Tunngaviusumik Inatsimmik piareersaaneq inuiaqatigiittut ataqatigiinnermik nutaamik misigissuseqalernissamik sanarfinerusoq inuiaqatigiinni ilaasortat suminnganeernerat apeqquaatinngu, soorlutaaq Tunngaviusumik Inatsisip qulakkiissagaa inuttut pisinnaatitaaffit kikkunnut tamanut atuuttut Kalaallit Nunaanni innuttaasunut tamanut atortinneqarnissaat.

Siunnersuutip aningaasatigut allaffissornikkullu kingunissai

Siunnersuutip akuerineqarnerani Namminersorlutik Oqartussanut aningasartuutissanik assigii-nngitsunik pilersitiviussaaq.

Taamaattoq siullertut eqqaasassaavoq aningaasatigut kingunissai ukuninnga tunngaveqassammata: isumalioqatigiissitap qanoq inuttalersorneqarnissaa, allaffeqarfissap annertussusissaa, allaffeqarfissap pilersinneqarnerani Naalakkersuisoqarfiup pioreersup arlaata ataannut inissinneqassanersoq immaqaluunniit imminerisamik allaffeqarfimmik pilersitsisoqassanersoq soorlutaaq suliassaq qanoq naammassiniarneqassanersoq.

Siumumiit aningaasartuutissanut assersuutissatut assingusutut tikkuartorsinnaasatuarpus tassaavoq Namminersorneq pillugu Isumalioqatigiissitap sulisimanera, Siumumiillu imannak nassuiassavarput:

Namminersorneq pillugu isumalioqatigiissitamut siullermut (Kalaaliinnarnik inuttaqartinneqartoq) aningaasartuutit 16,3 mio. kr. missaani annertussuseqarsimapput, aningaasartuutit ukiunut sisamanut atorneqarneri agguataarsimallutik. Naatsorsuutaavoq Tunngaviusumik Inatsisissamik piareersaataasumik isumalioqatigiissitassamut tamakkiisumik aningaasartuutissat tassunga missingersuunneqarsinnaasut, apeqquaalluni suliassaq tassunga sanilliunneqarsinnaanersoq.

Naatsorsuutigineqartariaqporli aningaasartuutit tamakkerlutik ikinnerunissaat Tunngaviusumik Inatsimmik piareersaataasumik isumalioqatigiissitap sulinissaminut suliakkiissutit sinaakkutis-saasa killingi annikinnerummata isumalioqatigiissitap assersuutatta suliaanniit.

Siunnersuutip namminersorlutik suliffeqarfutilinnut kingunissai

Siunnersuut aningaasatigut allaffissornikkullu kinguneqarnavianngilaq suliaq qitiusumik allaffeqarfissuarmiit ingerlanneqassammat.

Qujanaq